

Bille roasan von pèrng

Un fiore, un dono sempre gradito! Ma i fiori selvatici meritano rispetto e vanno osservati e lasciati nel loro ambiente naturale.

Atz ununbuantzeck von lertz (martzo) iz dar earst tage von längz un di earde heft à auzzodarékha! Haür dar bintar iz gest läng, di earde hatt gemak rastn gerècht untar a baiza un dikha dekh. Azma geat pa balt makma seng di earstn röasla boda spitzarn. Sa soin sèmm pitt soi khöpfle gekheart zuar dar sunn...sa pükhanse zuar diar zo grüazade. Boda zorgéat dar lest snea iz voll pitt klökkla, sneaklökkla un bökkln vo boinichtn. Pa Laitn, au pa khnottn, soinda sött schümmane pöllstar vo hoadarn. Gianante vürsner bartndra spitzarn di bisbökkln asò pumblat un gel, di tuttscharla un di bisan bartnse vülln pitt sempümmala un gele pipakan; ma di sèlln bomar givalln daz meararste soinz di vergizzmainicht pitt khlummene un liachte plabe röasla. Vorgèzparaz nèt von affan, groaz, hoach un roat un von schüzz bodase offetüan pinn schümma bëttar un spèrrnse balda khint dar reng. Moi mämma gedenkhtze ke, in ta' vo Corpus Domini, di diarndla boda hám gihatt givank di boricht hám gihatt a zümmale voll pitt margaritn un bökkela un hámse auzgedjukht pa beng. In madjo, dar mänat vodar Madânnna, di khindar von länt


hám gisüacht inn pa maürla, augimacht ána zemént, a schümmaz löchle zoa zo macha au a pillele bosa hám gilekk ploaz roasan un a khertze un datz abas hámaz ágizüntet un soin gánt zo halta au 'z petle. Aniaglaz khinn hatt gihaltet att soi pillele, umbrómm 'z hatt augimacht zoa zo vorhoaza dar Madânnna ke'z berat khent brevar!

Alln gevàlltzen aunemmen an matz roasan, ma gedenkhpaz, nèt auzozèrranar kartza vil umbrómm sa soin schümma bosa plüan...z iz pezzar schaungse à un lazzanze bosa soin, umbrómm di roasan magatz neméar krescharn! A roas iz hërt a schümmaz geschénkh, ma velt nia. S.F.



Fegatelle - foto WNZ

An naüng pediàtra vor Folgràit, Lavròu un Lusérn?



L'Assessore alla Sanità della PAT, Stefania Segnana, ha assicurato che la Provincia si sta muovendo per assegnare un nuovo pediatra all'altopiano. Purtroppo, a quanto pare, la sede competente sarà Besenello. Lusérn nuovamente tagliata fuori?

'Z iz hërt a daz sèll. Lusérn iz hërt a mearar augeoalt vo allz. Di lusérnar mochan hërt a khempfan fin an lestn zo haba eppaz mearar. In ándar tage, atz 26 von hornung-fevrà, di Provintz vo Tria hattaz gemachet bizzan ke si iz nà zo süacha a par naüge pediàtra, vor di lendar bodaz hám mågl. Un, fin da, eppaz guatz! Fra dise soinda o Folgràit un Lavròu. Un, hërt a lestn,

Lusérn. Umbrómm khüde hërt a an lestn? Umbrómm 'z parirat ke dar naüge pediàtra bart khemmen gelekk in Kamòu vo Besenell. Khöttmar erändre, atza a lusérnar boda hatt a khinn, mocht gian fin nidar a Besenell, bait 46 km vo üs! Saibar narrat?! Un anvétze, kisà bia nò, Folgràit bart hám asò zboa pediàtra, umman atz Folgràit un umman a Besenell, bait lai 14 km. I hánz nèt au pinn folgràitar odar pinn Kamòu vo Folgràit. I hánz au pittar Provintz vo Tria! Allz hatt ágeheft pittar motzióng Degasperi, boda est iz in partito "Onda Civica", boda hatt gevorst zo lega an pediàtra vor Lavròu un Lusérn. Ja, lai

vor Lavròu un vor Lusérn! Umbrómm, Folgràit hatt sa an pediàtra! Un anvétze? Baz khinta vür? Ke di Provintz geat zo lega an naüng pediàtra nidar in Vallagarina, zboa trittn nàmp Folgràit! 'Z khintmar zo lacha! Un an lestn, di müatar vo Lusérn, boda soin sichar koradjósat zo lega au famildja in an länt auz vo allz, azza hám mågl vonan pediàtra, mochan gian odar atz Folgràit, odar atz Lavròu ma lai 2 urn an fintzta, odar in Valsugâna. Speràbar atza disar naüng pediàtra bart khemmen da atz Lusérn o, seànka atza 46 km soin vil zo macha vor imen o.

Dar Nachtvogl

A djar spetar

A un anno dall'inizio del primo lockdown, ci troviamo ancora in piena pandemia globale. Nonostante d'estate ci sia stato un accenno di miglioramento, dove si pensava che tutto fosse finito, con l'arrivo dell'autunno le cose sono peggiorate e, dopo un anno, non si sa ancora quando tutto questo finirà.

'Z iz gest dar abas von 9 von martzo 2020, balda dar ex président von konsildjo Giuseppe Conte, hatt gemacht bizzan ke, von tage dòpo vort, daz gántz Beleschlánt berat gest in lockdown, asò zo prevenira in contagio von krántzvirus. Sa hám gespèrrt di schualn, di birthäusar, di ristorént, praticamente allz. Lai di boténg vo

geèzza un logicamente di ospedél soin gestànt offe. An earstn hattz gehoast ke 'z berat gánt vür lai a par bochan, ma lai 69 tang spetar, atz 18 von madjo, hattma bidar gemak auzgian a migele mearar. Di schualn però soin no gestànt gespèrrt un vil laüt boda hám gemak, soin gestànt dahùam z'arbata pinn computer. Balda iz gerift dar summar, hattz parirat ke 'z izta pasàrt allz un ke dar virus izta neméar. Khummane mascherine, laüt alle pittnåndar un alle atz mer un ma hatt addirittura gemak viazàrn ummar pa bëlt. Pròprio in ludjo von pasàrate djar, saibar alle gest kontént, umbrómm bar hám pensàrt ke dòpo viar mänat, ke vor alóra hámso no parirat vil, iz finalmente gest allz verte.

Ditza hatt nèt lai gemunt soin fria zo tüana bazma böllt un gian bobrall, ma o ke mindar laüt stian letz un ke vil von sèllnen boda soin gest kránkh soin khent gesünt. Laidar però iz nèt pròprio gánt asò, umbrómm vo setembre vort, ánsa azza hám offegetant di schualn, di casi vo krántzvirus, soin bidar khent vil un vo sèmm vort iz gest an offetüan un bidar spèrrn di continuo.

Est, a djar spetar, boaztma nonet bia 'z

bart gian vürsner un i gloabe ke niamat in sèll tage vo martzo, hettat khott un hettaten impitet ke, dòpo a gántze djar, di sachandar beratn no hërt a gest asò un ke 'z lem berat nonet gest khent bidar daz sèll vo voránahì.

An gruaz, Samuel Pedrazza

Istituto Cimbro
Kulturinstitut Lusérn
Tel. 0464-78.96.45
info@kil.lusern.it
www.istitutocimbro.it



Avviso - Mèldung

LA CRI ALTIPIANI EFFETTUÀ UN SERVIZIO GRATUITO DI TRASPORTO PER COLORO CHE SI RECANO A RICEVERE IL VACCINO. Il servizio è rivolto a coloro che hanno bisogno di essere trasportati/accompagnati, che non hanno un mezzo proprio o familiari che li possano accompagnare. Per questioni organizzative la CRI va contattata il più presto possibile, almeno un paio di giorni prima dell'appuntamento, al numero 347 3885199.

Hattar gisek in gipeto Pierrò flattarn obar dar Zimbar Hoachebene?

In Alto Adige sono già presenti tre coppie di gipeti che nidificano, ma in Trentino il gipeto Pierrò, giunto ai primi di dicembre dalle Alpi francesi, non ha trovato rivali e, grazie alle abbondanti nevicate che hanno causato parecchi decessi di ungulati, ha trovato cibo ed un ambiente favorevole che potrebbe incoraggiare una presenza permanente.



Azta in di lestn bochan hattar gibart an naüng vogl in hüml vodar Zimbar Hoachebene, magatz soin gest an gipeto: 'z iz ummandar von grözaarstn avvolti boda soin in Európa; a vich boda sbert 5-7 kile, mak lem 20-25 djar azzar iz frai atti pèrng un 45 djar azzar lebet pittn mānn, iz läng mearar baz an métro ma soine vëttrech soin bait schiar drai mètre un iz a vogl boda vriżzt vichar bodar vinnt sa toat. Azparz böll khön pezzar, daz meararste vriżtar di pummandar bodar vinnt schaugante ummar baldar flattart: di khlummman pummandarn djukhtarse nidar ingántz un di groazan machtarse prèchan lazzantese valln abe von hüml atti khnottn. Dar lest gipeto boda iz khent gitòatet von mānn iz gistorbet 'z djar 1913 in Beleschlánt, atti Alpm, vo sèmm vort iz khent gántz sber mang seng sött schümmane groaze vögl in ünsar länt. 'Z iz daz sèll boda iz vürkhent viln àndarn billn vichern: bölf, lintschi, pern, stambechi un, apze vor dise vichar, vor in gipeto o iz gest bichte tün eppaz zo rétta di biane bodada no soin gest. Vor ditza, in di djardar 80 von tausanhunnoünhundart, itza khent augilekk an prodjekt zo traga atti Alpm àndre gipeti.

Auz pan earstn von kristmånat 2020 itza girift in da ünsar províntz dar gipeto Pierrò; dar hatt schiar zboa djar un iz hergirift von Alpm vodar Frântscha, flattrante obar in Alpm Marittime un in Appennino emiliano, dar izzeze augihalitet a nacht in Pianura Padana un an lestn izzar girift atta Zimbar Hoachebene bodar iz khent gisek meararne vert zbisens Kholegen un forte Cherle. Bar bizzan allz ditza umbrómm, nàmp in vëttrech, hattar augihenk an Gps boda zoaget in studjös bodar geat.

E.v.K.

Adjarvo Covid-19

Un anno fa a quest'ora eravamo in pieno lockdown: un momento che ha portato con sé nuove grandi sfide ma che ha anche permesso una nuova riscoperta dello stare in famiglia.

In di earstn tang von lentzmånat von vorgànnate djar, daz gántz Beleschlánt iz gest abegespèrrt vor in Covid-19, dar gántz schaüla beata boda vodar Cina iz gerift fin ka üs machante vörtn da gántz bëlt. Balda dar governo hatt detzidart zo spèrra allz, hattar auzgemacht ke di uffici un di schualn beratn gánt vürsner "online" atti rete internet. Sichar lai bintsche laüt soin sa gest gebónt zo arbata asò, vo dahuam un vorà in computer, vor di meararstn iz gest a gántz naüge sachan.

Di khindar un di djungen hám gemocht stian vorà in computer vil urn attn tage, vil vert pinn mämme odar pinn tatte o, umbrómm sa soin nèt gest guat zo tüana alümma: di maistre o hám gehatt zo tüana zo konvertira di letziónen online, zo provàra zo höara bia di khindar hám gelebet disa situatióng un bazza hám getánt inngespèrrt in haus di gántzan tage. Alle, vorà in skérmo, soin gánt inn in di häüsarn von àndarn, schaugante di möbl, di pildar boda soin gest atti maurn un z'sega di àndarn laüt vodar famildja: di prüadarla boda hám geböllt seng baiza iz gest atti computer, di khindar von maistre boda soin sèmpasàrt odar di khatzan bodase soin gemach straichln atti schoaz. Az iz bar ke, in di birsarstn moménti khemmenda auz di schümannan sachandar, in da sèll situatióng di famildje un di schual hám gemacht squadra. In kompanjia, mämme, tatte un maistre soin nàgestànt in khindarn, haltantense okkupàrt, machantese lirnen, lesan, schraim, spiln un springen inn in haus zo provàra zo macha pasàrn da sèll zait. Bar mang furse khön ke vor di meararstn famildje ditza iz gest a zait squàse "speciale": pittar arbat un pittar bëlt boda iz gánt hërt bahémegar, niamat hatt gehatt pensàrt zo maga stian mearare bochan inn in haus, da gántz famildja in kompanjia, zo süacha un zo venna di zait zo stiana asò nàmp in khindarn.

Giada von Galèn